

Հայաստանի Հանրապետության ոստիկանության
կրթահամալիրի պետի « 14 » 03 2019 թ.
թիվ 145 - Ա հրամանի

Կ Ա Ն Ո Ն Ա Դ Ր ՈՒ Թ Յ ՈՒ Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ԿՐԹԱՀԱՄԱԼԻՐԻ
ՈՒՍՈՒՄՆԱՄԵԹՈՂԱԿԱՆ ԵՎ ԶԱՐԳԱՑՄԱՆ ՎԱՐՉՈՒԹՅԱՆ ՄԻՋԱԶԳԱՅԻՆ
ՀԱՄԱԳՈՐԾԱԿՑՈՒԹՅԱՆ ԵՎ ՏԵՂԵԿԱՏՎԱԿԱՆ ՏԵԽՆՈԼՈԳԻԱՆԵՐԻ
ՆԵՐԴՐՄԱՆ ԲԱԺՆԻ

I. Ընդհանուր դրույթներ

1. Սույն կանոնադրությամբ կարգավորվում են Հայաստանի Հանրապետության ոստիկանության կրթահամալիրի (այսուհետ՝ Կրթահամալիր) ուսումնամեթոդական և զարգացման վարչության միջազգային համագործակցության և տեղեկատվական տեխնոլոգիաների ներդրման բաժնի (այսուհետ՝ Բաժին) հիմնական խնդիրներին, գործառույթներին և ղեկավարմանը առնչվող հարցերը:
2. Բաժինը Կրթահամալիրի ուսումնամեթոդական և զարգացման վարչության կառուցվածքային ստորաբաժանում է, որն ապահովում է օտարերկրյա պետությունների ոստիկանական ուսումնական հաստատությունների հետ միջազգային համագործակցությունը, կրթական գործընթացի միջազգային առաջավոր փորձի ուսումնասիրությունը, ուսումնական գործընթացի բարելավման և արդիականացման նպատակով տեղեկատվական տեխնոլոգիաների ներդրումը:
3. Բաժնի հաստիքակազմը հաստատվում և փոփոխվում է Հայաստանի Հանրապետության ոստիկանության պետի հրամանով:
4. Բաժինն իր գործունեության ընթացքում ղեկավարվում է Հայաստանի Հանրապետության օրենսդրությամբ, Հայաստանի Հանրապետության ոստիկանության, Հայաստանի Հանրապետության կրթության և գիտության նախարարության իրավական ակտերով, Կրթահամալիրի ու Կրթահամալիրի ուսումնամեթոդական և զարգացման վարչության կանոնադրություններով, Կրթահամալիրի ներքին իրավական ակտերով և սույն կանոնադրությամբ:

5. Բաժնի կանոնադրությունը հաստատվում և դրանում փոփոխություններն ու լրացումները կատարվում են Կրթահամալիրի պետի հրամանով:

II. Բաժնի հիմնական խնդիրները

6. Բաժնի հիմնական խնդիրներն են՝

- 1) օտարերկրյա պետությունների ոստիկանական ուսումնական հաստատությունների հետ համագործակցության, փոխօգնության և զարգացման ուղղությամբ աշխատանքների իրականացում,
- 2) ուսումնական գործընթացի բարելավման և արդիականացման նպատակով տեղեկատվական տեխնոլոգիաների ներդրում,
- 3) Հայաստանի Հանրապետության ոստիկանության համար որակյալ կադրերի պատրաստման գործում կրթական գործընթացի միջազգային առաջավոր փորձի, ուսուցման նորագույն տեխնոլոգիաների ուսումնասիրություն և ներդրում,
- 4) օտարերկրյա պետությունների ուսումնական հաստատությունների, օտարկրյա կազմակերպությունների հետ համագործակցության երկկողմ և բազմակողմ արձանագրությունների, հուշագրերի և պայմանագրերի նախագծերի մշակում, դրանց կնքման և նրանցում ներառված դրույթների կատարման ապահովում,
- 5) այլ պետություններից ստացված հրավերների ուսումնասիրության, Կրթահամալիրի ծառայողների օտարերկրյա պետություններ գործուղումների կազմակերպման, ինչպես նաև արդյունքների ամփոփման և գործուղումների հաշվառման իրականացում,
- 6) պրոֆեսորադասախոսական, ուսումնաօժանդակ անձնակազմի և սովորողների շարժունությանը նպաստող ծրագրերի պլանավորում և իրականացում,
- 7) Կրթահամալիրի կայքէջի սպասարկում և անխափան աշխատանքի ապահովում, տեղեկատվության տեղադրում:

III. Բաժնի հիմնական գործառույթները

7. Բաժնի հիմնական գործառույթներն են՝

- 1) օտարերկրյա պետությունների ուսումնական հաստատությունների, օտարկրյա կազմակերպությունների հետ համագործակցության երկկողմ և բազմակողմ

- արձանագրությունների, հուշագրերի և պայմանագրերի նախագծերի մշակում, դրանց կնքման ապահովում,
- 2) օտարերկրյա պետությունների ուսումնական հաստատությունների, օտարերկրյա կազմակերպությունների հետ կնքված արձանագրությունների, հուշագրերի և պայմանագրերի դրույթների կատարման կազմակերպում և ապահովում,
- 3) Կրթահամալիր այցելած պատվիրակությունների ընդունելության աշխատանքների կազմակերպում, լուսաբանում և անհրաժեշտության դեպքում անմիջական մասնակցություն,
- 4) միջազգային համագործակցության և տեղեկատվական տեխնոլոգիաների ներդրման շրջանակներում ուսումնասիրությունների իրականացում և առաջարկությունների ներկայացում,
- 5) միջազգային համագործակցության շրջանակներում օտարերկրյա պետությունների ուստիկանական ուսումնական հաստատություններում կիրառվող կրթական մոդելների, ուսումնական գործընթացի առանձնահատկությունների և արդի մոտեցումների ուսումնասիրում,
- 6) Կրթահամալիրի միջազգային գործունեության շրջանակներում թարգմանչական աշխատանքների իրականացում,
- 7) գործուղումներ մեկնող Կրթահամալիրի ծառայողների փաստաթղթերի գրանցում, հաշվառում և հաշվետվության ներկայացմանը աջակցում,
- 8) տեղեկատվական տեխնոլոգիաների ներդրման շրջանակներում օտարերկրյա պետությունների ուստիկանական ուսումնական հաստատություններում կիրառվող նորագույն ծրագրերի ուսումնասիրում և առաջարկությունների ներկայացում,
- 9) Կրթահամալիրի կայքէջի անխափան աշխատանքի ապահովում, ինչպես նաև դրա արդիականացման վերաբերյալ կատարված ուսումնասիրությունների արդյունքում առաջարկությունների ներկայացում,
- 10) տեղեկատվական տեխնոլոգիաների բնագավառում նոր զարգացումների և ծրագրերի կիրառման արդյունավետության վերաբերյալ առաջարկությունների ներկայացում,
- 11) տեղեկատվական տեխնոլոգիաների բնագավառում շահագրգիռ այլ ծառայությունների և միջազգային կազմակերպությունների հետ համագործակցության ապահովում,
- 12) Կրթահամալիրի համակարգչային տեխնիկայի ծրագրային ապահովում և տեխնիկական աշխատանքների իրականացում,
- 13) «Սերվեր» համակարգչի անխափան աշխատանքի ապահովում,

14) համակարգչային ցանցի անխափան աշխատանքի ապահովում, սպասարկում և համակարգում, օգտատերերի IP հասցեների սահմանում,

15) Կրթահամալիրում ներդրված կառավարման ավտոմատացված համակարգերի սպասարկման խնդիրների ուսումնասիրության և վերլուծության իրականացում, ինչպես նաև այդ համակարգերի տեղայնացման, կարգավորման աշխատանքների իրականացում և ծրագրային սպասարկում: Համակարգչային ծրագրերի և տեխնիկական միջոցների արդիականացման ուղղությամբ առաջարկությունների ներկայացում:

IV. Բաժնի ղեկավարումը

8. Բաժինը գործում է Կրթահամալիրի ուսումնամեթոդական և զարգացման վարչության պետի անմիջական ենթակայության տակ:

9. Բաժնի գործունեությունը ղեկավարում է բաժնի պետը, որը պաշտոնի նշանակվում և պաշտոնից ազատվում է Հայաստանի Հանրապետության ոստիկանության պետի հրամանով: Բաժնի պետը կազմակերպում ու համակարգում է բաժնի աշխատանքները և ապահովում դրանց իրականացումը: Բաժնի պետի բացակայության ժամանակ նրա պարտականությունները կատարում է Բաժնի պետի տեղակալը:

10. Բաժնի պետի և աշխատակիցների կողմից իրականացվող աշխատանքները կարգավորվում են իրենց գործառույթային պարտականություններին համապատասխան: Նրանց գործառույթային պարտականությունները հաստատում է Կրթահամալիրի ուսումնամեթոդական և զարգացման վարչության պետը: